

# Kontuola

ANTZUOLA / Egubakoitza / 2004eko azaroaren 19a / 223. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

## Zinema emanaldiak oraingo asteburuan hasiko dituzte

AINTZANE IRIZAR

Gaur, egubakoitza, hasiko dituzte aurtengo ikasturteko zinema emanaldiak. Denboraldi honetan, gainera, izango dugu berritasunik; izan ere, gazteendako eta helduendako filmak ere eskainiko dituzte, egubakoitz gauean, hain zuzen ere.

Aurreko urtetan umeendako filmak bakarrik eskaini ditu Udalak Olanaren etxeko aretoan. Aurtengo denboraldian, baina, gazteendako eta helduendako filmak ere eskainiko dituzte. Eskaintza berri hori egubakoitz gauean izango da, 22:00etan.

Egubakoitzeko emanaldi hauek antolatzea erabaki du Udaleko Kultura batzordeak, udako Zinea izarpean programak arrakasta handia izan zuelako.

Domeka arratsaldetan, berriz, orain arte bezala, umeendako filmak ikusteko aukera izango dugu. Emanaldi horiek ere Olanaren etxeko aretoan izango dira, 17:00etan.

Helduen emanaldiei dagokienez, *Van Helsing* eta *Troya* izango dira lehenengo bi egubakoitzetan eskainiko dituzten filmak.



KONTUOLA

*Van Helsing* filmarekin hasiko dituzte emanaldiak gaur, egubakoitza, 22:00etan.

Umeei dagokienez, berriz, honako filmak ikusteko aukera izango dute: *Shrek II*, *Asterix eta Kleopatra*, *Hermano oso*, *Los tres mosqueteros*, *Pinocho 3.000* eta

*Titin. Marrazoen aintzira*.

Berria-ren bildumako hainbat film ere ekarriko dituzte; hala nola, *Rudy txerrixoa*, *Gezi urdina*, *Ipar haizearen erronka*...

Umeei 1,30 euro ordaindu beharko dituzte filmak ikusteko; egubakoitz gaueko gazte eta helduendako sarrerak, berriz, bi euro kostako dira.

### HERRITARREN HITZA / Jone Lete • Langabetua

## Antzuolara ere iritsi da

Iluntzeko zortziak ziren eta Eguzki auzoko sailhesbidean jarri nintzen herrira sartzen ziren autoei begira. Bat, bi, hiru, lau, bost... hamar auto sartu ziren herrira eta horietatik zazpi ezezagunak egin zitzaizkidan. "Antzuolara bizi izatera etorri den kanpoko jendea izango da", pentsatu nuen nire baitan.

Egia da, bai, inguruko herrietatik, Bergara, Arrasate, Aretxabaleta, jendea etorri dela gure herrira bizi izatera. Hau horrela bada, haurrak ere gehiago egongo dira, etorri den jendea gaztea da eta.

Hurrengo goizean eskola aurrera joan nintzen. Eskolara sartu ziren haur gehienak ezagutzen nituen, baina, guztiak ez; "beraz, egia izango da gure herria handitzen doala", pentsatu nuen. Haur haien gurasoak, ordea, ez ziren Arrasate, Bergara edo inguru-koak.

Beraien herrialdea utzi eta hona etorri dira zerbait hobea-



"Gurean ere aniztasun kulturala errealtate bihurtu da"

goaren bila. Ikusten da gurean ere "aniztasun kulturala" errealtate bat bihurtu dela, eta ez dela soilik Bartzelona, Madril, Gasteiz... eta horrelako hiri handietan gertatzen den fenomeno.

Inguruko herrietako jendeari kostatu egiten bazaio herrian integratzea, imajina dezagun

gure hizkuntza, kultura, ohiturak... ezagutzen ez dituen

pertsona bati zenbat kostatuko zaion.

Ireki egin behar gara eta gure kultura, ohiturak, herria... erakutsi, baina, beraiek eta beraien onartuz eta errespetatuz. Gaur egun, Antzuolan aniztasun kulturala badagoelako eta honekin bizitzen ikasi behar dugulako.

Anima gaitzen gehiago zabaltzen eta elkar ezagutzen herrian guztiok erosoago eta gusturago sentitzeko. Guztiok egin beharreko lana da, baina emaitza politak lortu ditzakegu herrian, eta herri aberatsago bat lortu.

### LABUR

#### Gabonetarako 'Herria oparitu' lotea salgai

*Herria oparitu* izenarekin, Udalak salgai jarri du honako produktu sorta: *Antzuolako hizkera*, *Cesareo Gabarain*, *Antzuolako ohitura zaharrak* eta *Antzuola 1900-1970* libururak, alardearen gaineko bi liburuxka, herriko mapa eta *Barne-barnetik* bideoa. Udalletxean eta Itzar-en egongo dira salgai, 30 euroren truke.

#### Erretiratuek irteera egingo dute Azpeitiara

Azpeitiako trenaren museoa, Loiolako basilika eta San Inazioaren etxea bisitatzera joango dira erretiratuek hilaren 25ean. Izena emateko aukera izango duzue hilaren 22an eta 23an, 18:00etatik 19:00etara, erretiratuen lokalean. 9 euro kostako da bidai.

#### Santa Zezilia dela eta, kalejira egingo dute txistulariek

Datorren astelehenean, hilak 22, Santa Zezilia musikarien zaindariaren eguna dela eta, kalejira egingo dute herriko txistulariek, 19:30ean. Hilaren 28an, domeka, egingo dituzte Santa Zeziliaren ospakizunak. Meza ondoren, abesbatzaren emanaldia eta luncha izango ditugu.

#### Doro Zobaran ipuin kontalaria izango dugu zapatuan

Udal Liburutegiak antolatuta, Doro Zobaran ipuin kontalaria izango dugu bihar, zapatua, 18:00etan, liburutegian bertan. *Buhamea* ipuina kontatuko die han batzen diren neska-mutikoei. *Buhamea* herri herri, eskolaz eskola, auzoz auzo dabil eta horrela, horiek guztiak ikusi eta ezagutzen ditu.



## IRAKURLIAREN TXOKUA

### KABO, AMAIA ETA BESTE ATXILOTUAK ASKATU

Patxi, Amaia eta beste 15 euskaldun espainiar poliziak komunikatuta ditu Madrilen; ezagutzen dugu Garzonek euskaldunen aurka erabakitako hainbat agindu zola bukatu diren.

Joan zen astean, urruti joan gabe, 12 euskaldun atxilotu zituzten Bizkaian; zuzeneko tortura saioak iragan ondoren 8 lagun kalean erabatu, xehe-tuta. Lehenik eta behin, salatu beharrekoa da 5 egunetarako heldu daitekeen komunikazio egoera; ez bere familiak eta ez beste inork atxilotuen berririk ez dugu.

Patxiaren gurasoak adibidez, 15 ordu beranduago jakin dute, kanpoan bizi dira eta; ordura arte ezin izan gara harremanetan jarri.

Hori dela eta gaur, ostirala, manifestazioa burutuko dugu Zurrategin hasita.

Ez ditzagun Kabo eta Amaia inpunitate guztiarekin torturatzen utzi! Etor zaitez mobilizazioetara!

ANTZUOLAKO  
ASKATASUNA

## ELKARRIZKETA

IZASKUN LARRAÑAGA/PAUSOKA GURASO ELKARTEKO PRESIDENTEA

*“Eskolako zaintza zerbitzuarena oso gai konplexua eta korapilotsua da, asko eztabaidatu beharrekoa”*

A.I.

**M**artitzenean, hilak 23, urteko batzarra eta batzar berezia egingo ditu Pausokak. Batzar horietan landuko dituzten gaien gainean eta eskuarteetan dituzten erronken gainean berba egin dugu Izaskun Larrañagarekin.

### Ze gai landuko dituzte urteko batzar orokorrean?

Batzar orokorrean, betikoa: urteko diru kontuak, urteko ekitaldiak zela joan diren aipatuko dugu eta datorren urteari begira ditugun erronken gainean ere jardungo dugu. Gainera, batzordekide berriak aukeratuko ditugu. Baina, aurretik, batzar berezia egingo dugu, estatutuetak bi puntu aldatzeko; batetik, batzordeak sei bokal izan beharrean, zazpi izatea erabakiko dugu; haurtzaindegiko ordezkaria izango da zazpigarren hori. Bestetik,

batzordekide izateko baldintzetako bat ere aldatuko dugu.

### Zela joan da urtea?

Ondo, balorazio positiboa egiten dugu. Urtero bost ekintza antolatzen ditugu: Santo Tomas eguneko azoka, Gabonetan abes-tera irteten gara, aratusteetan torrada jana, jaietako umeen herri bazkaria eta tortilla lehia-keta; guraso askok parte hartu du ekintza horietan eta oso balorazio positiboa egiten dugu. Ikastaroak ere antolatu ditugu eta parte hartzea handia izan da.

### Ze erronka dituzte aurrera begira?

Alde batetik, haurtzaindegia zabalduko dute laster eta hori erronka handia izan da. Bestetik, zaintza zerbitzuaren gaia darabilgu eskuarteetan; eskola orduetatik kanpo eskolak zaintza zerbitzua eskaintzearen gaia, alegia. Egia esan, oso gai konplexua eta korapilotsua da eta asko eztabaidatu beharrekoa.



A.I.

## KIROLA

### PARTIDUAK

#### FUTBOLA

Azaroak 20  
10:00: Antzuola-Urki (Infantilak)  
12:00: Antzuola-Almen (Neskak)  
15:30: Antzuola-Bergara (Gazteak)  
Azaroak 21  
12:00: Antzuola-Urki (Kadeteak)

#### PILOTA

Azaroak 19 (Gipuzkoako Txapelk.)  
21:00: Olalde-Gazteleku (paletaz nag.)

### EMAITZAK

#### FUTBOLA

Gazteak 3 Antzuola 2 (2. erreg.)  
Axular 10 Antzuola 0 (Gazteak)  
Antzuola 3 Bergara 4 (Kadeteak)  
Urola 3 Antzuola 1 (Neskak)  
Arizmendi 0 Antzuola 7 (Infantilak)

#### PILOTA

Gipuzkoako Kluben Arteko Txap.  
Bergara-Olalde (eskuz inf.) ... 18-17  
Olalde-Zazpi Itturri (eskuz kad.) ... 16-22  
Olalde-Ozkarbi (eskuz nag.) ... 11-22  
Olangu-Olalde (paletaz nag.) ... 35-23



### Pala txapelketa hasi dute

Olalde elkarteko pala jokalariek aurreko asteburuan jokatu zuten denboraldi berriko lehendabiziko partidua. Kanpoan jokatu zuten partidua hori, Ordizian, eta ezin izan zituzten menpean hartu ordiziarrak; 35 eta 23 galdu zuten antzularrek.

Oraingo asteburuan etxean jokatu dute, Gaztelekuaren aurka; gaur, egubakoitz, izango da hori, 21:00etan.

Bost jokalarik dihardute pala txapelketan: Gorka Iturbek, Jon Alberdik, Iker Mansok, Balendin Zabalok eta Gotzon Zabalok, hain zuzen ere. /A.I.

# Harizki

SUKALDEKO ALTZARIAK

**MUEBLES IGEA**

Sukalderako eta bainurako altzariak  
Altzari rustikoetan espezializatuak



IGELTSEROTZA

Jose Luis Zabalo

Kalegoi 9, 1. solairua  
ANTZUOLA.  
Tel. 943 76 60 89  
Faxa: 943 76 60 14

**ZAHAR BERRITZEAK:**  
Fatxadak  
Bainugela eta sukaldea  
Lokal komertzialak  
Teilatuak

**Eta orain....  
GREMIOEN  
KOORDINAZIOA**